

ce que nous auons crû en sa loy, & de ce que nous sommes heritiers de sa grace, nous irons dans le Paradis en tel lieu que bon nous semblera, Dieu donne sa benediction aux gens de bien. Tu verras les Anges à l'entour du trosne de ton Seigneur qui loueront & qui exalteront sa gloire, ils diront, Dieu a iugé ses creatures avec equité, louange est deuë au Seigneur de l'Vniuers.

---

*LE CHAPITRE DV VRAY-  
croyant, contenant quatre-vingts cinq  
versets, escrit à la Meque.*

*Leçteur, Gelaldin intitule ce Chapitre le Chapitre du Clement.*

**A**V Nom de Dieu clement & misericordieux. Dieu est prudent & sage. Celiure est enuoyé par le tout-Puissant qui sçait tout, qui pardonne les pechez & qui agrée la conuersion de ses creatures, il est rigoureux en ses chastimens, & est indulgent à son peuple, il n'y a point de Dieu queluy, & tout le monde sera vn iour assemblé deuant sa diuine Maieité (pour estre iugé,) Personne ne dispute contre les preceptes de l'Alcoran que les impies, ne te scandalise pas s'ils viuent en terre avec quelque bon-

heur, le peuple du temps de Noé a mesprisé ses instructions, leur posterité a fait comme eux, & chaque nation a conspiré la mort de ceux que Dieu a enuoyé pour les instruire, ils ont disputé pour obscurcir la verité par leurs mensonges, mais ils en ont esté punis, & de quelle façon ! ainsi la parole de Dieu s'accomplit contre les impies, ils serót tous damnez. Les Anges qui sont à l'entour du trosne de Dieu, & ceux qui le portté, louent & exaltent sa diuine Maiesté, ils croyent en son vnité, & luy demandent pardon pour les vray-croyans. Seigneur ta misericorde s'estend par tout le monde, rien ne t'est caché ny au Ciel en la terre, pardonne les pechez à ceux qui se conuertissent, & qui embrassent ta sainte loy, deliure-les du feu d'Enfer ; ouure leur la porte des iardins d'Eden que tu leur a preparé, à leurs peres, à leurs femmes, à leurs enfans, & à ceux de leur lignée qui feront de bonnes œuures, tu es tout-Puissant & sage. Esloignez-vous du peché, celuy qui s'en esloignera ressentira les effets de la misericorde de Dieu & au iour du Iugement, & iouira de la felicité eternelle. Les infidelles seront hays de Dieu, la hayne est infiniment plus dangereuse que la vostre, serez-vous infidelles apres auoir esté appellez à l'observation de la loy de salut ? Ils ont dit, Seigneur, nous feras-tu mourir deux fois ? & ressusci-ter deux fois ? mais ils diront au iour du Iugement, Seigneur, nous confessons de t'auoir offensé, nous confessons nostre peché d'auoir abiuré la croyance de ton vnité, ne sortirons nous iamais de l'Enfer pour

aller obseruer ta loy, & suiure le chemin de salut? Non, vous patirez dans le feu d'Enfer, parce que vous auez crû ceux qui adorent les Idoles, & parce que vous auez dit que Dieu a des compagnons esgaux à luy. Tout obey à vn seul Dieu tout Puissant, c'est luy qui vous fait voir les miracles, & qui vous enuoye des biens du Ciel & de la Terre; personne ny pense que ceux qui se conuertissent. Priez Dieu & obseruez sa loy, encore que ce soit contre la volonté des impies, il esleue ses creatures à tel degré qu'il veut, il a créé son trosne, & enuoye ses inspirations à qui bon luy semble pour prescher le iour du Iugement, ce iour le peuple sortira des monumens, & personne ne se pourra cacher de sa diuine Maiesté. Qui commandera ce iour? ce sera Dieu seul victorieux, ce iour il recompensera chacun selon ses oeures sans iniustice, il est exact à faire compte. Si tu presches aux impies le iour du Iugement le cœur les souleuera & seront pleins d'affliction, leurs prieres ne seront pas exaucées, & personne n'intercedera pour eux; Dieu cognoit ceux qui ont des yeux de trahison, & void tout ce qui est dans le cœur des hommes, il iuge de toute chose avec verité, les Idoles qu'ils adorent sont sans pouuoir, Dieu seul entend tout & peut tout. Ne considerent-ils pas qu'elle a esté la fin de ceux qui les ont precedez, qui estoient plus puissans & plus riches qu'eux? Dieu les a surpris en leurs pechez; il n'y a personne qui les ait pû sauuer, parce qu'ils ont mesprisés les Prophetes de sa diuine Maiesté, ils ont mesprisés

loy, & ont esté des impies, mais il les a rudement chastiés, il est tout - Puissant & tres-rigoureux. Nous auons enuoyé Moïse avec des miracles, avec des raisons claires & intelligibles à Pharaon, à Haman, & à Caron; Ils ont dit que Moïse estoit sorcier & menteur, & lors qu'il leur a presché la verité de nostre part, ils ont dit, tuez-le avec tous ceux qui le croient, & rendez leurs femmes honteuses; mais leur conspiration n'estoit qu'impieté; Pharaon a dit, ne m'épéschez pas de tuer Moïse, qu'il inuoque son Dieu pour le sauuer, ie crains qu'il n'altere vostre loy, & qu'il n'apporte du desordre en terre, Moïse dit, Dieu mon Seigneur & le vostre me gardera de la malice des superbes qui ne croient pas au iour du iugement; Alors vn hôme des domestiques de Pharaon qui professoit secrettement la veritable loy, dit, tuerez-vous vn homme qui declare que Dieu est son Seigneur? & qui vous fait voir ses miracles? s'il est menteur son mensonge sera contre luy, que s'il dit la verité, il vous arriuera quelque chose de ce qu'il vous presche, Dieu ne conduit pas les meschants ny les menteurs; O peuple, vous commandez au iourd'huy en terre avec splendeur, qui nous gardera de la colere de Dieu si elle tombe sur nous? Pharaon a dit, le ne vous diray autre chose que ce que ie vous ay cy-deuant dit, & vous conduiray tous au droict chemin; Celuy de ses domestiques qui professoit secrettemēt la vraye loy, dit, ô peuple, ie crains que vous ne soiez chastiez cōme l'ont esté ceux qui vous ont precedés, comme

le peuple de Noé, d'Aad, de Temod, & ceux qui ont esté apres eux, Dieu ne veut pas faire d'iniustice aux hommes, i'apprehende pour vous le iour du iugement, iour auquel vous ressuscitez avec peur de rendre compte de vos actions, celuy que Dieu deuoiera ne trouuera personne qui le conduise. Certainement Ioseph est cy-deuant venu avec des instructions claires & intelligibles; neantmoins vous en auez doutez iusques à sa mort, & auez dit qu'apres luy Dieu n'envoyera point de Prophete semblable à luy, ainsi Dieu deuoie les meschans qui doutent de sa loy, il hay ceux qui en disputent sans raison, ils sont abhorrez de ceux qui croyent en sa diuine Maicsté; Ainsi Dieu endurey le cœur des orgueilleux & des tirans. Pharaon a dit à Haman, faits moy bastir vn haut Palais, peut-estre que i'arriueray aux Cieux & iusques au Dieu de Moïse, ie crois qu'il est vn menteur; ainsi Pharaon s'est delecté en ses mauuaises actions, il s'est deuoie du droict chemin, & toute sa conspiration n'a esté que sa ruine. Celuy de sa maison qui estoit vray-croyant a dit. O peuple, suiuez-moy, ie vous conduiray au droict chemin, les biens de la terre passent legerement, & les biens du Ciel sont eternels, qui mal fera mal trouuera, celuy qui fera bien homme ou femme croyant en Dieu, entrera dans le Paradis, où il sera enrichy de toute sorte de biens sans compte. Pourquoy me conuiez vous de me precipiter dedans le feu d'Enfer, puisque ie vous exhorte à vostre salut? vous me conuiez d'estre impie

*Haman  
estoit le  
Lieutenant  
general de  
Pharaon.  
Voy Ge-  
laldin.*

& de croire que Dieu a des compagnons, & ie ſçay que cela n'eſt pas; le vous appelle vers le tout-Puiſſant & miſericordieux, il n'y a point de doute que ie n'adoreray pas vos Idoles, ils ne vous peuët pas exaucer ny en ce monde ny en l'autre, nous ſerons tous vn iour aſſemblez deuant Dieu qui condamnera les infidelles au feu d'Enfer, penſez cy-apres à ce que ie vous preſche, ie ſuis reſigné à la volonté de Dieu, il void tout ce que font les creatures, il les chaſtiera du mal qu'ils feront, & de leurs mauuais deſſeins. Il a enuoyé ſa punition ſur la lignée de Pharaon, ils ont mérité d'eſtre precipitez dans le feu d'Enfer, où ils brûleront ſoir & matin; On leur dira au iour du iugement, ô gens de Pharaon, allez, entrez dedans le feu d'Enfer. Les infidelles ſe quereileront dedans l'Enfer, les pauures diront aux riches; Nous vous auons ſuiuſ, pourrez-vous aujourd'huy nous deliurer des flammes eternelles? ils reſpondrôt, nous ſommes tous damnez avec vous, Dieu eſt treſ-juſte Iuge. Les damnez diront aux miniſtres de l'Enfer; Priez voſtre Seigneur qu'il allége ces tourmens pour vn iour, ils reſpondront, n'avez-vous pas eu en terre les Prophetes & les Apôſtres de Dieu pour vous inſtruire? ils diront, ouÿ, Priez donc Dieu vous-mêmes, les impies n'ayment que l'impieété, ie protegeray en terre mes Prophetes, & ceux qui obſerueront ma loy, & particulièrement au iour du iugement, ce iour les impies n'auront point d'excuse qui leur ſoit vtile, ma malediction tombera ſur eux, & ſe-

ront tous damnez. Nous auons enseigné à Moïse le chemin de salut, & auons fait les enfans d'Israël heritiers de ses instructions pour instruire ceux qui les comprendront. Perseuere & patiente la promesse de Dieu est infailible, demande pardon de tes pechez, & exalte la louïange de ton Seigneur soit & matin; Ceux qui disputent contre les commandemens de Dieu sont sans raison, & n'ont autre chose en leurs ames que l'orgueil & l'ignorance; Demandez secours à Dieu, il entend tout & void tout, la creation des Cieux & de la Terre est plus grande que la creation des hommes, mais la plus grande partie du monde ne le cognoit pas, l'aveugle n'est pas semblable à celuy qui voit clair, celuy qui fait bien n'est pas semblable à celuy qui fait mal, ny l'obscurité n'est pas comme la lumiere, mais peu de gens y pensent; sans doute le iour du Iugement viendra, neantmoins la plus grande partie du peuple ne le veut pas croire: Vostre Seigneur a dit, inuoquez moy, ie vous exauceray, ceux qui s'esleueront contre ma loy iront en Enfer, & seront eternellement deuoyez. Dieu a créé la nuit pour vous reposer, & le iour pour trauailler, il est liberal enuers ses creatures, mais la plus grande partie du peuple ne l'en remercie pas, Dieu est vostre Seigneur, Createur de toute chose, il n'y a point de Dieu queluy. Comme peuuent blasphemers les impies? ainsi blasphemers ceux qui sont ingrats des graces de Dieu; Il vous a affermy la terre, il vous a couuert des Cieux, il vous a formé, il vous a enrichy, il est vo-

stre Dieu, vostre Seigneur, beny soit Dieu Seigneur de l'Vniuers, c'est luy qui vous oste & qui vous donne la vie, il n'y a point de Dieu que luy, soiez luy obeissans, & obseruez sa loy, loüé soit Dieu Seigneur de l'Vniuers qui vous a créé de bouë. Dis aux infidelles, il m'est deffendu d'adorer les Idoles que vous adorez, Dieu m'a enseigné son vnité, i'ai receu cōmandement de n'adorer que le Seigneur de l'Vniuers, il vous a créé de poussiere, de bouë, & de sang congelé; il vous fait naistre petits enfans, il vous fait arriuer à l'aage de discretion, à la virilité, & à la vieillesse, plusieurs meurent auant c'est aage, & tous arriuent au temps de leur destinée, peut-estre que vous cognoistrez son vnité; c'est luy qui vous fait viure & mourir, lors qu'il veut quelque chose il dit, sois, & elle est. Ne voyez vous pas que ceux qui disputent contre ses commandemens s'éloignent de sa loy. Ceux qui abiurent nos commandemens, & ce que nous auons ordonné à nos Prophetes de prescher aux hommes, cognoistront leurs erreurs lors qu'ils se verront les chaisnes au col & les fers aux pieds; ils seront traifnez & bruslez dedans l'Enfer, alors on leur dira, où sont ces Idoles que vous auez adorez sur la terre? ils respondront, ils se sont esloignés de nous, certainement ils sont sans pouuoir, ainsi Dieu deuoye les infidelles à leur confusion. On leur dira, ces peines vous arriuent, parce que vous auez esté superbes & insolens sans raison, entrez dedans les portes de l'Enfer, c'est la demeure des superbes, vous y demurerés eter-

nellement. Patiente & perseuere, la parole de Dieu est infaillible, ie te feray voir vne partie de ce que ie promets aux hommes, ie te feray mourir, & tu les verras tous assemblez pour estre iugez. Certainement nous auonsenuoyé des Prophetes auparauant toy, nous t'auons parlé d'vne partie de nos Apostres, & l'autre partie ne t'a pas esté manifestée; les Prophetes, ny les Apostres ne peuuent rien prescher sans la permission de Dieu, il chastie les melchans quand il veut, il iugera les differents qui sont entr'eux & les Prophetes, & exterminera les infidelles. Dieu a créé les animaux pour vostre vsage, vous en mangez vne partie, & l'autre vous sert de montures, vous en tirez du profit, ils portent la charge, comme font aussi les nauires pour l'aduantage de vostre commerce, Dieu vous manifeste ses graces, & quelles graces! les mespriserez-vous? Les infidelles ne considerent-ils pas la fin de ceux qui les ont precedez qui étoient plus puissans & plus riches qu'eux? leurs tresors ne les ont pas sauuez, ils se sont moquez des Prophetes & des Apostres qui les ont preschez, & à la fin ils ont ressentey les peines qu'ils auoient mesprisées. Lors qu'ils ressentiront les tourmens de l'Enfer, ils diront, nous croyons en vn seul Dieu, & renouçons aux Idoles, cette profession de foy leur sera inutile dedans l'Enfer, ils encourront la rigueur de la loy de Dieu, qui a esté obseruée contre ceux qui les ont precedés, & tous les infidelles seront damnez.